

**Ufficio Stampa della Provincia autonoma di Trento**

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

**COMUNICATO n. 1911 del 25/08/2020**

**Traduzione in ladino**

## **Forum de Alpbach: Trentin, Sudtirolo e Tirolo dessema per projetèr l davegnir de l'Euregio**

**Renforzèr sia strutures democratives e tor ite de più la popolazion. Chest l'obietif de l'Euregio del davegnir, l Grop european de cooperazion per l teritorie che en domenia ai 23 de aost, metù adum dai trei presidenc di trei raions, Trentin Sudtirolo e Tirolo, se à binà a Alpbach, per sia scontrèda tradizionèla de la Giornèda del Tirolo e del Forum European. “ Se scontrèr anché chiò l'é n segnèl de speranza vedù la situazion en esser, - l'è dit l president del Trentin. Endèna chisc meisc senestres sion stac bogh de colaborèr per ge fèr front a na situazion grieva entravegnuda a cajon de la pandemia. Te na fasa tant scherpena – l'è dit amò- per pontèr via endò da nef cognon tor consaputa de la storia e di valores e se oujer al davegnir, engaissé da coraje e voa de inovazion, se emprevalan de l'esperienza de duc arjonta delaite de l'Euregio. N moment emportant sarà de segur raprejentà dai diesc egn de cedeàn de la Fondazione del GECT per chi che vegnarà fat festa l'an che vegn. Cognon se dèr jù ence tel davegnir per valorisèr l'Euregio delaite de l'Europa, te l'enteress de nesc comuns e avisa de nesc joegn.**

“La setemènes e i meisc passé i à desmostrà – l'è dit l Capitan del Tirolo e president atuèl de l'Euregio – cotant che l'é emportant la cooperazion sorafora la seides, soraldut endèna tempes de crisa. Volon e cognon arseguerè che l'Euregio no vegne lascià endò. Demò a chesta vida la generazion che vegn les podarà se emprevaler de chesta istituzion, metuda sù delaite del projet de pèsc de l'Union Europeèna”. “I valores che rec noscia sozietà – l'è dit l president de la Provinzia autonoma de Busan – endrezèda su la solidarietà no i é stac sgorlé sù demò da la crisa leèda a la pandemia, ma ence dant, da la crisa entravegnuda a cajon di enfughé. Ades più che zenza, l'é emportant ge dèr de contra a tentatives populistics che vel portèr inant na politica de l'odie”. La Jonta de l'Euregio, dessema coi Consees provinzièi, l'è donca metù sù na comiscion, reta da Walter Obwexer, espert de derit european, che scomenzarà subito i lurieres sui neves statuc. L cher de la reforma sarà l renforzament de la strutures democratives e la partezipazion de la popolazion. Anchecondi, l Dreier-Landtag” metù adum dai raprejentanc lité, l vegn endrezà ogne doi egn. Tel davegnir, i Comuns i vegnarà touc ite semper de più tras la creazion de n “Consei di Comuns”. L'é pervedù ence che vegne realisà, tras n projet pilot che l vegnarà metù a jir del 2021, n Consei di sentadins de l'Euregio. Anchecondi l'Euregio l'é raprejentà te ogne aministrazion de raion e te l'ofize comun de l'Euregio de Busan. Per n coordinament amò mior per l davegnir, fèsc besegn ponc de contat sparpagné fora sui teritorie. Per chesta rejon vegnarà orì sentes a Trent e a Dispruch. Vegnarà ence pissà n Festival de la cultura de l'Euregio, che vegnarà endrezà ogne an, a roda, te un di trei raions. Per ge dèr l met a l'Euregio de ciapèr pe tel setor del turism, la organizacions turistiche regionèles di trei raions les à sotscriet anché i tratac istitutive de n nef GECT “Euregio Connect”, che didarà dò la cooperazion anter i trei membres Tirolo Werbung, IDM Sudtirolo e Trentino Marketing. Tinùltima, ence chest an, delaite de la Giornèda del Tirolo, l'é stat dat fora l pest Joegn Enrescidores de l'Euregio che l ge é stat dat sù a Verena Wiedemaier, del Management Center Innsbruck. A la fin del Forum i trei presidenc i se à scontrà col president de la Republica de l'Austria Alexander Van der Bellen, te na curta scontrèda no formèla, olache l'é stat recordà amò l'emportanza de la colaborazion sorafora la seides delaite de l'Euregio.

**Traduzion di Servijes Linguistics e Culturèi del Comun general de Fascia**

(Traduzione a cura dei Servizi Linguistici e culturali del Comun general de Fascia)

(cdt)